



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Afghan rara nung India nunger
photo journalist Danish süogo

Olympics asoshi Mirabai
Chanu Tokyo tongogo



VOL. XVIII NO. 273 (ADOK 273) DIMAPUR

KÜPTOKNÜ (SATURDAY)

CHITENI (JULY) 17, 2021

₹ 5.00

COVID-19 Nagaland: Positivity jenjang 10.83% kümogog

Nagaland nung Jul 18 nungi Aug 1 tashi Unlock-3 alitsü

Anogo pezü atongtepa taneptsü angur dang nungi puteter teimba

Kohima, July 16, 2021 (TYO): Nagaland nung ano nisung aika dak COVID-19 putettsü tenzükogog aser Hokolbarnüa nisung 95 dak putetogog.

Tanü agi anogo pezübuba Nagaland nung taneptsü angur dang nungibo puteter teimba liasü.

"Tanü nisung 95 dak COVID-19 putet. Parnokji Kohima nung 47, Tuensang nung 13, Mokokchung nung 11, Dimapur nung 9, Longleng nung 6, Phek nung 5, Kiphire nung 3 aser Peren nung 1 lir. Parnok züngsema nisung ajak agi 26,476 kümogog" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Hokolbarnü COVID-19 puteta alir nisung 61 taneptsü angu. Parnokji Mokokchung nung 17, Dimapur, Kohima o Phek nung tukuku (9), Zunheboto nung 6, Kiphire nung 5, Mon nung 3, Peren nung 2 aser Longleng nung 1 lir. Parnok züngsema nisung 24,145 taneptsü nguogog" ta paisa metetdaksü.

Nagaland nung COVID-19 nungi taneptsü angur 91.18% lir aser tang nisung 1,082

anepaludar, ta paisa shisem.

"Tanü Dimapur nung nisung ana aser Mokokchung nung ka asüba züngsema tasür ajak agi 519 kümogog saka nisung 14 bo tanga tashidak ajanga asü," ta Dr Kikon-isa ashi.

"Nagaland nung COVID-19 alitsü akok ta temolung melemi bilemba sample 2,44,460 tendang. RT-PCR ajanga 1,00,245, TrueNat ajanga 64,704 aser Rapid Antigen Test ajanga 79,511 tendang" ta Dr Kikon-isa metetdaksü.

"Brihostibar tashi nung nisung 5,39,479 nem COVID-19 vaccine indang dose 6,51,620 agütsüogog" ta State Immunization Officer, Dr Ritu Thurr-ia ashi.

Vaccine agirtemji frontline workers 60,449, healthcare workers 15,872, arishi küm 45 ser tempur 1,68,977 aser arishi küm 18 nungi 44 tsüngda alir 2,94,181 lir, ta paisa ashi.

"Vaccine agirtem rongnung nisung 1,12,141-i dose anaprong agiogog. Parnokji frontline workers 343,426, healthcare workers 11,554, arishi küm 45 ser tempur 66,017 aser arishi küm 18 nungi 44 tsüngda alir 144 lir" ta Dr Thurr-isa metetdaksü.

Kohima DTF-i review cum sensitization sentong tenzükogog

Dimapur, July 16, 2021 (TYO): July 16, 2021 nü Sechu-Zubza, Kohima nung Kohima District Task Force (DTF)-i district review cum sensitization programme ka agiogog.

Minister in-charge, Tongpang Ozukum PWD (Housing & Mechanical) lenisüba kübok DTF-i iba sentong ayonga agi.

"Alimai iba wara anema raraan aruba nung asenok indang teinyaktsüji SOPs sülen anidaktsüba aser vaccine agitsüba dang lir" ta Minister Tongpang-isa ashi.

"DTF-i nübortem dang tashiyim agi vaccine agiang ta ashitsü atema onok senzürba masü saka Nagaland Chief Minister-i nübortem dang testing & vaccination indang osang sangokjang ta tuyuba ama inyakerba dang lir. Iba ya media sabang balala nung COVID vaccine indang olulu aser tamagitsü osangtem prokshiba

metongshitsü atema inyaker" ta paisa metetdaksü.

"Sorkar nenok nem tashiyim agi vaccine agidaksütsü makok saka iba ya nenok indang tebilemstü khuret ka lir. Sorkar, village aser colony task force-i latettsüba SOPs sülen nenoki anidaktsüla, aji ta mesüra Epidemic Disease Act 1897 kübok merenshitsu" ta Minister Tongpang-isa ashi.

Paisa nübortem dang pei pei task force aser surveillance team den amalitepa sample tendangtsü ayongzük.

Minister Tongpang-isa village council züngsemtem dang sorkar tenung nung yim shia nung task force akangshia yimertem COVID-19 nungi kümzüka ayutsü tayongzükba agütsü.

Kohima district task force-i bendanga agüja inyakra nung tajangzük angutsü aser ibaji tanga district tematema tatishitsü tajang asütsü, ta paisa metetdaksü.



July 16, 2021 nü Nagaland Secretariat nung Minister Neiba Kronu, Advisor Mmholnumo Kikon, Advisor Medo Yhokha aser Principal Secretary Abhijit Sinha nungertemi osangbener den jembidang agiba noksa angur. (Kohima, July 16)

Kohima, July 16, 2021 (TYO): July 18 nungi tenzükog Nagaland nung anogo 15 tashi Unlock-3 alitsü, ta Hokolbarnü government spokesperson aser Minister Neiba Kronu-i metetdaksüogog.

Nagaland nung July 1 nungi 7 tashi Unlock-1 liasü, iba sülen July 8 nungi 17 tashi Unlock-3 alitsü.

Hokolbarnü Chief Minister Neiphu Rio menden ser High Powered Committee (HPC) on COVID-19 senden amendang July 18 nungi August 1 tashi Unlock-3 alitsü teletetba agi.

HPC-i District Task Force (DTF) tem dang nungi tebilembatem angadanga sülen iba teletetba agi, ta Minister Kronu-isa ashi.

Jul 26 nungi Higher Sec. & College lapoktsü:

July 26, 2021 nungi Higher Secondary school aser College tem lapoktsü melar saka teaching

aser non-teaching staff temi COVID-19 vaccine mezüngbuba dose bo agir alitsüla mesüra vaccine magirtemi anogo 15 shia COVID-19 test indang negative result agütsütsüla ta Minister Kronu-i metetdaksü.

Higher secondary aser college lapoktsü molungba rejutemi pei pei DTF nem 'Expression of Interest' agütsütsüla aser ibaji staff ajak nem vaccine agütsütsü mesüra negative test results agütsütsü molunga agizüktsü atema lir, ta paisa ashi.

College kaketshirtem ajak vaccine agitsü asü koda ta osangbenertemi asüngdangdang "arishi küm 18 ser tempur ajak nem vaccine angati agütsür anungji sorkari college tem dang kaketshirtem vaccine agitdaksütsü atema ajungmesotsü akok" ta HPC co-spokesperson aser Advisor, Mmholnumo Kikon-i langzü.

"Ajisüaka, arishi küm 18 ser teküpok tanurtem atema vaccine yanglua mali anungji higher secondary class agitsü atema SOPs timi latettsüla aser talisa COVID-19 Appropriate Behaviour beshitsüla" ta paisa metetdaksü.

"Class 10 aser teküpok class nung kaketshirtem atema school melapoki atatsü aser August 1 sülen ang sorkari teletetba ka agitsü" ta Minister Kronu-ia ashi.

Tourist aser tangalen nungi nisung arutsü melar:

HPC-isa COVID-19 vaccine dose anaprong agiba tourist tem Nagaland-i arudaksütsü atema teletetba agiogog.

Lokti adenshi lateta aliba nung temelenshi kecha mali aser ki telung nung nisung 50 aser kima nung nisung 100 tashi dang adenshitsu melar, ta Kronu-isa ashi.

(Maneni tapak 10 nung...)

NPCC-i anogo 10 nü lungkak aitba tembangogog Nagaland Governor nem memorandum ka agütsü

Kohima, July 16, 2021 (TYO): Nagaland Pradesh Congress Committee (NPCC)-i anogo 10 nü tashi totzü aser nungdakba nung jenjang atuba anema lungkak aita aruba tanü tembangogog.

All India Congress Committee's (AICC)-i linük ajungalen lungkak aitba nung shilemka ama NPCC-ia Nagaland nung July 7, 2021 nungi iba sentong ayonga agitsü tenzük.

Hokolbarnü NPCC president K Therie-i anir ketdangpurtemi Governor maliba agi Commissioner & Secretary of Raj Bhavan ket nung memorandum ka agütsüogog.

2014 küm ama Centre Excise duty, State VAT, LPG aser SK Oil

jenjang ajemang ta NPCC-i takhangba agütsür.

2014 küm crude oil indang barrel ka nung dollar 101 liasü saka tang dollar 78 teküpok lir saka kechisarena nung jenjang tuogog, ta NPCC-i agütsüba memorandum nung shia lir.

"2014 küm petrol litre nung Rs 71, diesel litre nung Rs 52 aser LPG cylinder nung Rs 483 liasü" ta NPCC general secretary G K Zhimomi-i osangbener dang ashi.

Linük nung jenjang kanga atubaji taoba ita ana tsüngda nung liasü. Centre sorkari semer pongu (35) ben tashi totzü jenjang ajungket aser tanü linük nung yimti 200 aser Nagaland kübok district 12 prong nung petrol litre

nung Rs. 100 tema kümogog, ta paisa ashi.

Centre-i petrol litre nung Rs 32.90 aser diesel litre nung Rs 31.80 Central Excise Duty agir. Iba ajanga Centre-i tesüba küm tenet tsüngda Rs 22 lakh crore aazükogog. Ano, taoba ita 6 tsüngda edible oils aser pulses jenjang anasü agi teimba ajungketogog aser nungdakba ajak nung jenjang tuogog, ta Congress-isa metetdaksü.

Totzü jenjang onsara atuba den ano Covid-19 lockdown ajanga, kechisarena ajak nung jenjang ajungketogog aser iba ajanga sensakertem kanga timtemer, ta parnokisa ashi.

(Maneni tapak 10 nung...)

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nunger ama melentepa tamshi.

Mozü achitsü agüja lira, aji shitak chiang.

Tango junga mesashiteta, teku ashiba, aketba aser temang metaba timtem lira yakta doctor bushiang.



Medziphema nung ketdangsürtem shisadoktenba senden ka amen



Dimapur, Chiteni/July 16 (TYO): Medziphema sub-division kübok department ajak nungi tekolaktem shisadoktenba senden ka July 16, 2021 nü ADC Medziphema indang office nung ADC, Imsongmeren mendenpuba sür mena liasü.

ADC ajanga züngsemtem dang pei mapa nendaka inyaksü asoshi kati ka yaritsü

ajungshia liasü. Paisa aruyaa aliba Independence Day atema department ajak nungi shisa lemsateptsü ayongzüka liasü.

Tzüngsarusa ajanga tang aluyimer tem timtema aliba densa aser department ajanga yimtsüng balala nung aluyimer yariba indang osang tongmelang agi SDAO, Rosemary ajanga agütsü. PHED, Medziphema nung

SDO Ichirang Zeliang ajanga urban sector nung Jal Jeevan Mission indang osang agütsü aser Medical Officer, CHC Medziphema, Dr Temsu ajanga Medziphema sub-division nung COVID-19 tensa aser COVID Care indang jembia liasü.

Maneni SDO, PWD (R&B), Kihozhe ajanga sub-division nung lenmang aser apuitem indang osang agütsü.

Pughoboto SDPDB senden nung medical inyakyim indang jembia

Dimapur, Chiteni/July 16 (TYO): Additional Deputy Commissioner & SDPDB vice chairman, Thungchanbemo Tungoe lenisüba kübok Pughoboto Sub-Division Planning and Development Board senden July 16, 2021 nü DB court hall nung mena liasü.

Senden nung LADP 2021-22 scheme tem agizüka liasü, koba nung Pughoboto sub-division atema COVID-19 teyari dena lir.

SMO, CHC Pughoboto, Dr. Esther Kath ajanga COVID-

19 atema mozü agütsüba maparen indang senden nung lemsatepba mapang, July 14 tashinung yimtsüng 24 nungi nisung 4,568 nem mozü agütsüogo, ta ashi.

Arishi küm 18 nungi 44 tsüngta COVID-19 mozü agir alir nisung 2,365 aser arishi küm 45 nungi 59 tsüngta alir nisung 1,177 nem kasa mozü agütsüogo. Maneni arishi küm 60 aser tema alir nisung 810 nem COVID-19 mozü ya agütsüogo, frontline nung inyaker nisung 123 aser

healthcare nung inyaker nisung 93 nem iba mozü ya agütsüogo, ta lai ashi.

Laisa Pughoboto Sub-Division kübok yimtsüng ajak nung vaccination aser sensitization drive agiba indang lokti nem metetdakja liasü.

EE (PWD), Chengkato Kath ajanga sub-division nung lenmang tia indang osang agütsü. Iba senden nung züngsem tasentem pelashishia agizük, aser züngsem tasentem rongnung EAC Ghatashi, Nitile Tep densema liasü.

AMCH aser Yuvraj Singh Foundation tsüngta MoU ka zülutep

Dibrugarh, Chiteni/July 16 (Agencies): Tashidak wara agi alima ajunga sünger aliba mapang Assam Medical College and Hospital (AMCH) nung yipten 100 aliba pediatric ICU ka amenoktsü atema Yuvraj Singh Foundation aser AMCH tsüngta Hokulbarnü Memorandum of Understanding (MoU) ka zülutepa liasü.

AMCH principal cum chief Superintendent Sanjeeb Kakati-i ashiba agi, "Yimya agi

Yuvraj Singh Foundation yagi tanurtem cancer anepaluba atema inyaker saka COVID-19 tashidak wara poktetba sülen parnoki India tesem ajunga nung yipten 100 aliba child ICU tenlatsü maparen tenzük. Parnoki mezüngbuba instalment nung yipten 50 agütsütsü aser iba sülen ano yipten 50 agütsütsü."

100 bedded pediatric ICU nungya full fledged ventilator yipten 20 aser Oxygen generated bed 80 alitsü, koba

AMCH nung tanurtem indang ward nung amenoktsü, ta pai ashi.

Yuvraj Singh Foundation ya tajangzük mebushiba lokti tentet ka lir, koba India nunger cricket asayar nüngtugu, Yuvraj Singh-i tenzük. Iba foundation yagi cancer dak rangloker healthcare sector nung temolung agütsür.

Region nung nübur nem medical facility tajungba agütsütsü atema AMCH ya 1947 nung amenoka liasü.

Assam nung Class IX & X nung azünger ajak nem smartphone agütsütsü

Guwahati, Chiteni/July 16 (Agencies): Assam nung aliba government school nung class IX aser X nung azünger kaketshir ajak nem smartphone agütsütsü.

Assam indang Education Minister, Ajanta Neog ajanga iba sentong ya July 16, 2021 nü budget session nung metetdaksü.

COVID-19 mechi tensa mejungi kuma school aser kakat rejutem shibangtsüsa akumba ajanga iba telemtetba ya agi, ta lai ashi. Kaketshir ajak atema online education agitsü ta sangdongaka

kaketshir shilem tuluka smartphone aser internet maliba ajanga mezüngteter.

"Iba scheme ya ajanga state nung kaketshir lakh ti ajangzüktsü aser school züngtur anenba ajema akumtsü," ta Neog-i ashi.

Unified District Information System for Education Plus (UDISE+) ajanga study ka Brehostibarnü sayaba nung state kübok school nung ki-o- jen peria maliba indang shia liasü. UDISE+ ya indang-indanga Union Ministry of Education ajanga amshir. Iba report ya academic year 2019-

20 nung zülua liasü.

Study ajanga ashiba agi, Assam nung aliba school shilem 12.7 nung dang computer lab junga lir. Secondary school züngtur anenba tanurtem ya shilem 32.3 lir, koba linük nung timtiba rongnung ka lir, ta ashi.

Assam nung school ajak agi 65,907 lir. Yangji government school 47,157 lir, sorkari yariba school 5,024 lir, private school 6,074 aser danga 652 lir. Study ajanga ashiba agi, government school shilem 11.44 nung dang computer lab lir, aser shilem 4.32 nung dang internet connection lir.

CMMSF sentong ya online ajanga agitsü

Dimapur, Chiteni/July 16 (TYO): Nagaland Board of School Education (NBSE) ajanga agiba HSLC Examination 2020 nung tematiba jenjang nguteter kaketshir 50 nem tenüngsang agütsütsü asoshi Chief

Minister's Meritorious Students Fellowship (CMMSF) felicitation sentong ya virtual yimya nung July 19, 2021 nü anepdang 10:00 ako nung agitsü, ta sangdong ka ajanga metetdaksü.

Mon DPDB senden nung HSLC & HSSLC 2020 topper tem tushi

Dimapur, Chiteni/July 16 (TYO): Mon District Planning and Development Board senden July 15, 2021 nü Deputy Commissioner, Mon, Thavaseelan K, IAS mendenpuba sür mena liasü.

Sheanghah Mokok yimtsüng nung aliba Ahng Kins Foundation ya registration agitsü aser Mon nung Sainik School amenoktsü atema tim department dangi yoktsü asoshi iba senden nung agizüka liasü.

Senden nungsa Mon district nungi HSLC aser HSSLC 2020 nung temaba jenjang nguteter nem tenüngsang agütsü aser Topper temji yamai liasü:

HSLC 2020:

1. Lynee Konyak W
2. Wangyuh Konyak Y
3. Keamyang

4. Mitali Chauhan
5. Hangpo Shongpohru

HSSLC 2020 (Arts):

1. M Phoawang
2. Changlang Y
3. Phangnyo Konyak
4. Ayin Wangsha
5. Ngipam S Konyak

HSSLC 2020 (Science)

1. Watlong
2. Nachat Rebecca
3. Lily Mongyu

DPDB senden tembangba sülen ano maneni Road Safety Committee Mon indang senden ka mena liasü, kong tsünglanglen shia aliba ketdangsürtem ya Committee züngsem ama shimteta liasü:

- i) ADC Mon & Administrator Mon Town Council
- ii) CMO Health & Family Welfare
- iii) District Education Officer.

DGC nung Dr. Tainla Mar den tepila sentong agi



Dimapur, Chiteni/July 16 (TYO): Assistant Professor mapang nungi anisüngzük, Dr. Tainla Mar nem akum agütsü tepila sentong ka Dimapur Government College nung July 16, 2021 nü agia liasü.

Iba sentong nung Department of Education nungi Dr. Benjongkumba menden liasü aser sentong nung Principal in-charge, Kezhaleu Hesso, DGCTA tir Supong Jamir aser Dept. of Education indang HOD, Diethoseu Mepfhuo nungeri o tatsütsü jembia.

Tejembirtemi Dr. Tainla Mar ya nendaka agütsüba, meranga inyakba aser bendanga agütsüba tesayur ka lir, shiba dak pasasa agi sayutsü sempet keta aliba kaketshirtemi pela agizük, ta shia liasü. La service tatemlen doctorate ngutetba ajanga lai

angazüktsü jangraba aser meimba sayur, ta ashi.

Lai mezüng tesayur mapa inyakba bilemteta jembia liasü, kong la ya mezüngbo post graduate teacher ka dang liasü. Lai sayutsü asoshi tejangraba aser tesayur mapa inyakba mapang ajangshibatem lemsatepa liasü.

Dr. Tainla Mar-i DGC ya lar ki ama bilemer aser la iba college nung mapang tatsüka dang inyakaka tajangshiba tajung aika bener aor, ta ashi.

La college nung inyakba mapang yaritepba aser amalitepba atema lai DGC nung sendaka alirtem aser talisa Department of Education dang pelaba lemsatepa liasü.

Associate Professor Rebainla Ao ajanga alakteta sarasademja iba senden tembang liasü.

Mezüngbuba tetsür finance minister-i Assam Budget 2021-22 benok



Hokolbarnü Guwahati nung Assam Finance Minister Ajanta Neog den Chief minister Himanta Biswa Sarma na Assam Legislative Assembly nung state budget benoktsü atema arudang agiba noksa angur. (Guwahati, July 16)

Guwahati, July 16, 2021 (Agencies): Assam nung mezüngbuba tetsür finance minister Ajanta Neog-i Hokolbarnü Assam Budget benokogo.

Finance minister Neog-i benokba Assam Budget 2021-22 ya Rs 566.20 crore deficit Budget lir.

Neog-i la indang Budget nung public dang tax magütsü telemtetba agi.

Taoba financial year nung Covid19 wara ajanga state rongsenketzüng nung kongshiogo aser Tax department-i Rs 14,967 crore sarua aruba nungi Rs 14,967 crore dang sarutet.

2021-22 atema sorkar sen tarutsüji Rs 2,89,770.68 crore ta bendentetogo aser Rs 2,89,367.10 crore endoktsü ta asadantet ta Minister Neog-i metetdaktüsü.

Assam kübok district 5 nung medical college tasen 5 lapoktsü aser iba nung Rs 80 crore endoktsü, ta laisa ashi.

Medical college temji Golaghat, Dhemaji, Morigaon, Bongaigaon aser Tamulpur

nung lapoktsü, ta lai metetdaktüsü.

State sorkarisa Karbi Anglong district nung State University nung lapoktsü tebilemba lir.

Assam Budget, 2021-22 nung keta aliba onük kar:

COVID-19 ajanga nisung ka mesüra timba asüba kibong nem Rs 1 lakh teyari agütsütsü.

Assam Microfinance Incentive and Relief Scheme (AMFIRS) 2021 ta ser scheme tenzütsü aser iba ajanga microfinance loans apur nem teyari agütsütsü.

Department 48 nung mapa tazüng lakh 1 nung nisung shimoktsü.

State-i Gir nashi 2000 bener arutsü sentong lir.

2021-22 tashi nung tongtipang gari lenmang pezü yanglutsü.

Brahmaputra aser Barak anasa embankment cum roads kilometer 1,000 yanglutsü.

Assam nung tea estates 805 nung aliba kilen ajak nem Household Tap Connections agütsütsü.

Indigenous Faith and Culture

department ta ser tenzütsü aser iba kübok department asem- Directorate of Archaeology, Directorate of Museum and Directorate of Historical & Antiquarian Studies dendaktüsütsü.

Sorkar school tem nung Class IX & X kaketshir lakh 8 nem smartphone agütsütsü.

COVID ajanga tsürabur anaprong asüba arishi küm 15 ser teküpok tanur shia nem ita shia Rs 3500 agütsütsü.

Covid ajanga kinungbo asüba sensaker amitsür nem Rs 2.50 lakh teyari agütsütsü.

Dibrugarh aser Silchar nung Wildlife Safari aser Rescue Centres lapoktsü.

Tata Trusts den Assam Cancer Care Foundation (ACCF) tenzütsü aser iba ajanga 2022 tashi nung Dibrugarh, Barpeta, Tezpur, Lakhimpur, Mangaldoi, Kokrajhar, Jorhat, Guwahati, Silchar aser Diphu nung cancer hospital tem lapoktsü.

Mapang lemsar police battalion 10 lapoktsü.

New Delhi nung Assam Cultural Complex yanglutsü.

Assam-Arunachal arrtsü ken o okadak angatetteptsü

Itanagar, July 16, 2021 (Agencies): Assam aser Arunachal Pradesh tsüngda arrtsü mangatettep ken o okadak ajanga bentetsü molungtepogo, ta CM Khandu-i ashi.

Brihostibarnü DoNER minister GK Reddy-i ayongba senden ka nung jembidang pai iba osang metetdaktüsü.

Assam aser Arunachal

Pradesh tsüngda arrtsü mangatettep ken o okadak ajanga bentetsü molungtepogo, ta CM Khandu-i ashi.

Brihostibarnü DoNER minister GK Reddy-i ayongba senden ka nung jembidang pai iba osang metetdaktüsü.

Minister Narendra Modi aser Union Home Minister Amit Shah nati ashiba nung ajemdaker arrtsü ken o angatetteptsü lemtetogo, ta Khandu-isa ashi.

"Ita ana tsüngda telemtetba tajung kar agitsü imlar" ta paisa metetdaktüsü.



Guwahati nung Congress züngsemtemi LPG aser totzü jenjang atuba anema lungkak aitba noksa nung angur. (Guwahati, July 16)

Yi masü vaccine ki tonga bener arutsüla: Assam MLA Rakibul

Guwahati, July 16, 2021 (Agencies): BJP-i aniba sorkari ki tonga yi bener arutsütsü lemtetba atema Congress MLA Rakibul Hussain-i aitsüogo.

"Teburtemi yi ajemba ajanga tetsürtem dak tashiyim mapa inyakba kanga bulua ataloker. Lockdown mapang yi peria anguba ajanga nisung aikati yi jemer kinungtsütem reshikangshi tenzütkogo" ta Assam Assembly anogo pungububa nung Rakibul Hussain-i ashi.

"Sorkari ki tonga yi bentsür otetra kodaser tonga vaccine oa magütsüteter? Assam nung arishi küm 18 ser temapur ajak nem vaccine agütsütsü atema vaccine kwi nüngdaktüsü aser iba mapa kodang tembangtsü ta onoki metetnüa asüngdang saka iba indang osang mangu" ta paisa metetdaktüsü.

Assam sorkari Guwahati nung online ajanga yi ayoktsü, alitsü aser home delivery asütsü temelaba agütsüogo. Ajisüaka, sorkari yi ajemba dang nungibo Covid vaccination drive nung temolung talila agütsütsüla ta opposition MLA temi aitsür.

"Assam Cabinet-i Guwahati nung ita ka atema 'experimental basis' nung online ajanga ayoktsü telemtetba agiogo. Ibaji talok ngura state ajungalen inyaktsü" ta Assam Minister Pijush Hazarika-i ashi.

"Iba atema sorkari osang yakta sangdongtsü aser state excise department-i teinyaktsütem latettsü" ta Health Minister Keshab Mahanta-ia ashi.

Taoba mapang Meghalaya sorkari yi ayokba dokantemi home delivery asütsü atema license agütsütsü inyakyim agizükogo.

Meghalaya Police-i IED pokdaktüsür nisung 2 apu

Shillong, July 16, 2021 (Agencies): Bodbarnü East Jaintia Hills district nung IED pokdaktüsüba dak sendakba nung Meghalaya Police-i nisung ana puogo.

Hynniewtrep National Liberation Council (HNLC)-i iba tatalokba atema tenüng agiba sülen anogo ka lir nisung anaji

apu. Ajisüaka, police-i tena indang maittsü memetetdaktüsü lir. Bodbarnep police reserves camp nung IED ka pokdaktüsü. Iba lendong nung police ka yiru.

Taoba mapang police-i HNLC züngsemtem tepsetba aser reshikangshiba mangyanga iba mapa ya inyak, ta HNLC-i metetdaktüsügo.

Pasighat jail nungi jena aoer nisung 2 apu

Pasighat, July 16, 2021 (Agencies): Arunachal Pradesh Police-i July 11 nü Pasighat judicial jail nungi jena aoer nisung ana puogo.

Nisung anaji Abhijeet Gogoi aser Subhash Mondal na lir. Abhijeet ya Jonai nung aser Subhash ya Leku-Jhelum nung apu. Abhijeet aser Subhash na ya ozüng alema mapa inyaker

tetsüti nisungtem lir. July 11, 2021 nikongdang Pasighat judicial jail nung puoka aliba nisung 7 jena ao.

Ajisüaka, Arunachal Pradesh Police-i Abhijeet aser Subhash na dena nisung asempo pua aruogo.

Hombarnü police-i Mirbuk yim nung tepuokdak nungi jena aoer Kalen Apang apu.

DEBTS RECOVERY TRIBUNAL, GUWAHATI
 Government of India, Ministry of Finance
 Department of Financial Services (Banking Division)
 Suwarna Bhawan, House No. 12, New Town Path,
 G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)
 (See Sections 25 to Section 29 of the Recovery of
 Debts Due to Banks and Financial Institutions Act, 1993 and
 under Rule 2 of Second Schedule of the Income Tax Act, 1961)

D.R.P.C. No. 3342/2019

Bank of Baroda (Erstwhile Vijaya Bank) -Vs- Mrs. Lugai Pamei & Ors.

To,
Mrs. Lugai Pamei,
 Daughter of Late Gaijangpou Pamei, House No.- 51, Sachu Colony, Dimapur,
 Nagaland- 797112. (Certificate Debtor No.1)

Mrs. Alugang Pamei,
 Wife of Agles Prasad, House No.- 51, Sachu Colony, Dimapur, Nagaland-
 797112. (Certificate Debtor No.2)

Mr. Agles Prasad,
 Son of Late Kanhaiya Prasad, House No.- 51, Sachu Colony, Dimapur,
 Nagaland- 797112. (Certificate Debtor No.3)

This is to certify that a sum of **Rs.40,99,457.00 (Rupees Forty Lakhs Ninety Nine Thousand Four Hundred Fifty Seven only)** as per details given below has become due from you consequent to a Recovery Certificate issued by the Ld. Presiding Officer by an order dated 31-01-2019 in Case No. O.A. 277 of 2018.

(1) Amount due as per the Certificate Amount:	Rs. 44,99,457.00
(2) Interest from 11.06.2018 to 05.03.2021 @ 11.5%	Rs. 15,98,759.95
(3) Costs	Rs. 43,000.00
TOTAL	Rs. 57,41,306.95

2. You are hereby directed to pay the above sum within 15 days of the receipt of this notice failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

In additions to the sums aforesaid, you will be also liable for
 (a) such interest as is payable in accordance with the recovery certificate (D.R.P.C. No. 3342 dated 31.01.2019) for the period commencing immediately after issue of recovery certificate to the date of realization, and
 (b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 9TH DAY OF JULY, 2021.
 (Sudhir Kumar)
RECOVERY OFFICER



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI (JULY) 17, 2021

Assam Budget nungi angazüksüla

- P Tiamongba Aier

Hokolbarnü nung Assam nung mezüngbuba finance minister Ajanta Neog-i Assam Budget 2021-22 benokogo aser lai benokba budget nung keta aliba teinyakstütem aser sentongtem reprangdang, nüborsem asoshi tepelatsü osang aika angur. Taküm Assam Budget nung health tsütsü, talisa Covid-19 wara dak sendakba nung teyari aika agütsütsüba aser ano health infrastructure ulushitsüba onüktem dena lir. Finance Minister Neog-i benokba Budget nungsa tan financial year nung public dang tax magitsü lemtetba shia lir aser assembly-i iba tebilemba ya agizüka mapa küma inyakra, nüborsem kanga anisüngzüksü aser tajangzük tulu angutsü. Asenoki Budget nung health infrastructure tsütsü reprangdangra, Assam nung medical college 8 lir saka ano state sorkari Rs 80 crore endoka district 5 nung Medical College tasen ka ka lapoktsü shia lir. Külen, alima ajunga nung aser talisa India kübok state ajak nung Covid-19 wara ajanga timtemba mapang ka nung Assam state sorkari iba wara ajanga kongshir nem teyari balala agütsütsüba indang Budget nung enoka lir. Assam nung Covid-19 ajanga nisung ka mesüra timba asüba kibong shia nem sorkari Rs 1 lakh teyari agütsütsü. Maneni, tsürabur anaprong asüba tanur (arishi küm 15 ser teküpok) shia nem sorkari ita shia Rs 3500 agütsütsü. Ano, state sorkarisa Covid-19 ajanga kinungbo asüba sensaker amitsür nem Rs 2.50 lakh teyari agütsütsü ta Budget nung enoka lir. Anosa, yaküm nungi Covid-19 wara ajanga school melapoktettsüsa tia ajurur online class agia arudang kaketshirtemi timtem aser tetsükdaktsü aika ajuruba angeteta, Assam nung sorkar school nung azünger Class 9 aser 10 kaketshir lakh 8 shia nem smartphone kaka agütsütsü ta Budget nungsa benoka lir. Covid-19 wara ajanga rongsenkettsüng nung kanga mejungi kongshiogo aser iba ajanga bank amala nung sen apua alirtemi timtem kanga ajurur. Ibaji angateta Assam state sorkari Assam Microfinance Incentive and Relief Scheme (AMFIRS) 2021 ta ser scheme tasen ka tenzüksü aser iba ajanga microfinance loans apur nem teyari agütsütsü. Tatamsa, health infrastructure tsütsü Assam state sorkari Tata Trusts den yaritepa Assam Cancer Care Foundation (ACCF) tenzüksüba Budget nungsa shia lir. Iba ya 2022 küm tashi nung Dibrugarh, Barpeta, Tezpur, Lakhimpur, Mangaldoi, Kokrajhar, Jorhat, Guwahati, Silchar aser Diphu nung cancer hospital tem lapoktsü nükjidong nung lir. Anungji, Hokolbarnü Assam finance minister Ajanta Neog-i benokba State Budget nung health infrastructure ulushitsüba onüktem ya reprangdangra, India nung Assam ya tang dang nungi health centre tongtiba ka akümstüsa lir. Assam sülen Northeast nung state tejentiba rongnung tanabubaji Nagaland lir saka asen state nung tanü tashi medical college ka dang lapoka mali aser iba ya tebilemdangtsü tulu ka lir. Kohima nung medical college ka yanglutsü atema March 2014 nung lungbo azünga mapa tenzük saka tanü tashi ibaji metembangteti medical college lapoktsübaji asayamenü ka ama dang jembia arudar. Nagaland state sorkari Assam State Budget 2021-22 nungi tangazüksü aika lir, kechiyong sorkar ya nüborsem, pei sensotem tenzüksü atema kümtetba lir anungji sorkari nübor dak rangloker sentongtem atonga inyaka aotsüla. Ajsüaka, reprangdangra Nagaland nung sorkar menden nung mena alirtemi iba tangatetbaji amadokersa sentongtem atonger ama ajiteter. Tanü asenok den Assam nung health infrastructure dak rangloker tebilemba kar lemsateper, saka yashi benokba Assam State Budget ji reprangdangra, ano nüborsem asoshi mapa balala inyaktsütsüba, sorkar mapa nung nisungtem aniochtsüba, süngo lu ajak nung kilen shia nem tajemtsü tzü agütsütsüba, amitsürtem yaritsüba amala mapa aika inyaktsüba onüktem enoksema aliba angutsü. Anungji tan ser Nagaland state sorkaria State Budget renemdang tanga state temi yangluba aser talisa asen kidanger state Assam nungi ajizüka nüborsem dak rangloker sentongtem atonga inyaka ora, Nagaland nung alirtem ajangzüksü aser sorkar-a atakatem masü saka temoatsü ang angutsü.

OLEMSABANG

Pei sasa yarira, Tsüngremia yaritsü

Tzuwasanen Jamir (Mokokchung)

Tanü putu nübur rangben COVID-19 wara tsübutepba agi kimayimdonga sadema mesenzütettsüsa kümdaktsüogo. Joko kibok-kisemteptsütoa otsü maka tarendaktsü tulu. Mengudanger ka kimalen dang-a senzüa ngura coronavirus bener senzür ama atsübur aser ashibanga repranger. Yaküm tashibo coronavirus asen lima tonga marudang kanga tsübutepa litepogo saka tang wara mesen agi asen atepzüng tonga aru-aka züba-züba litepba angur. Aikati iba wara ya tiyazü ta-a jembir saka temulung nungbo meshitetba tarendakba kaka lir. Kechiba mali ta jembir saka temulung nung arendaka bilemer(?), kuliji balala alitsü saka aika asoshi tarendakba tulutibaji 'Coronavirus positive putetra anogo paika kecha-ia mouteti kidang shibanga ayutsü', 'lokto nung tangar tsüngdang tejak medentettsü', 'tangari ashibangtsü', 'mozümora teyari agia anepalutsü rongsen maka' ta asübatem ya lir. Hau iba ama arendaka bilembajia tim dang saka makamait mesüra tangari koda bilemstü (?) ta asüba jagi na tashitak wara nungi taneptsü mengutettsü saka lendongi dang yidaktsütsü. Ya alimar yimya ka dang kümadoker asünung, mebilemloktsü kulitem nem asenok memeyokdaktsütsüla. Adangji coronavirus ya asenok den teti alitsü aru ta metetdi.

Tangar dang na coronavirus mali ta sayunüaka tatembangba stageji tongerbo yimjak jagi adoklanglang. Yimjak nung jungkai adokbajibo atamata ka dang saka nisung takümji tongtipangba ta metetang. Waraji menaa lira positive-ji adoktsübasa saka mena melira kwiben tendangaka negative dang adoktsü. Anungji tendangtsü arendaka melili. Temang nung timtem tenzükba yimyatem (symptoms)-ji kanga mesükteper asünung nisung aikati yimra dang asütsü ta bilemer medendangi toktsür saka zükoka shirangba mapangbo mozü teyari bushiaka, oxygen-ji agiaka taneptsü menguteti senti taküm aika anojungi leper kümbangi ayir. Coronavirus ya metendang tashi shiba dak lir, shiba dak mali jangjatsü makok. Na meshirangaka waraji ne dak mena-a alitsü shingaia meteta mali. Saka aiben meshirangerji ta sür asenoki Social distance junga meyui aser face masks meinoki mesüra hand sanitizer mamshii züba-züba alidang asen ajanga nisung aika nem menaloktsütsü. Tanü asen lima kinük ajaklen ayimsünga coronavirus wara prokshibaji yamala mekümdangba ajanga adokdaktsür. Kechiba anogoshia positive puteter timba-timba akümer ta süra ajak ya asenok mekümdangba ajanga lir. Tanabuba nung mimshitepba ya lir. Temang nung timtem liaka aikati kecha mali ama mimbanga ayutsü meranger. Yamala tamachi tangatetba ajanga ne taküm jibo toktsür nai tangar taküm-a mapayutsür ta metettsüla. Tangar dang na kecha timtem mali ama sayunüadang (pretend) nai nisung kwika taküm lendongi yidaktsür? Shisadangang.

Lockdown ya asenok kima-ia maludaktsüi kidang shibanga ayutsü atema masü saka mozü shiteter mongintem den shisa agiteper sülen sorkari latettsüba Standard Operating Procedures (SOP) sülen tashi angaa anidakdaktsütsü nükjidong nung renemba lir. Lockdown liaka kechiba nübur nungdakbatembo tenokdangba makai inyakdaktsür ta süra asenoki SOPs-ji dang shitak benshira waraji azüoktettsü ta angatetdaktsütsü atema asameyanga inyakdangba dang lir. Saka Kodang lockdown lapokdir wara-ji samadoker ama asen senzütsü süa kati ka den tepila yua inyaksangshitsü tetuyuba mebenshir, face masks meinoker aser hand sanitizer amshitsüto nungdak mali ama kümdaktsür. Yamala tamashi tangatetba agi asenok telungi ludaki.

Tsüngrem dangbo iba wara samajang ta sarasademer saka nungdakba tetuyuba sülen manidakra wara tongpang madak asenoki kodanga takok mengutettsü. Anungji tanü nungi tenzüka mezüngbuba nung pei sasa pei temang anepalua marendaki coronavirus tendangdi, teyari bushidi, anempongdi aser temang meima anepaludi; süra Tsüngremia asenok yaritsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

IRF senden nung ICC-i India nung Religious Freedom osang metetdaksü



July 13-15 anogotem nung Washington D.C. nung International Religious Freedom (IRF) senden amendang tangokba noksa nung angur.

Washington D.C, Chiteni/ July 16 (Agencies): Brihostibarnü 2021 International Religious Freedom (IRF) Summit nung International Christian Concern (ICC)-i India nung religious freedom report metetdaksüogo.

Iba senden nung ICC-i India nung anti-conversion ozüngtem nung ajemdaker Muslim aser Khristantem densema minority teloktem anema inyakba osang metetdaksü. Tang India nung state 12 nungbo anti-conversion ozüngtem benoka lir.

Senden nung ICC Tir, Jeff King aser ICC Advocacy

Director, Matias Perttula na den Congressman Raskin, Ambassador Brownback aser Katrina Lantos Swett nungeri jembi.

Senden nung o jembirtem rongnung India nunger Khristan, Vijayesh Lall, Muslim nunger Ajit Sahi aser Hindu nunger Nikhil Mandalaparthi nunger densema lir.

ICC Tir, Jeff King-i, "India nung minority temi ajangshiba tebilemtüsü onük aika lir, aser iba linük nung temelenshi alitsü atema alima linüktemi longjemer inyaktsüla. 2021 IRF Summit nung shilem agitsü maongka anguba atema ICC-i pelar, iba denji külemi tarutsü

nung alima tesem balala nung lokti tentettem aser sorkartemi mera tajung agia inyaktsü imlar," ta metetdaksü.

July 13 nungi July 15 tashi Washington, D.C nung aliba Omni Shoreham Hotel nung tang mezüng ayongzüka agiba International Religious Freedom Summit nung ICC densema organizations 70 dak temai shilem agia denogo.

Iba senden ya taoba mapang IRF Ambassador-at-Large, Sam Brownback aser Lantos Foundation for Human Rights Tir, Katrina Lantos Swett na leniba nung agi aser iba senden nung linük 30 dak tema nungi lenirtem shilem agia aden.

Chhattisgarh nung police-i Khristantem dak tenük yoktsü tuyu

New Delhi, July 16 (Agencies): Chhattisgarh state kübok Sukma district nung Superintendent of Police-i police dang Khristan missionary tem aser Khristan yimsü dangi meyipba tribal nisungtem dak tenük yoktsü tuyuogo.

July 12, 2021 nü Superintendent of Police, Sunil Sharma-i, Khristan missionary temi tribal nisungtem aliba tesemtem semdang aser Khristan masüba tribal nisungtem Khristan yimsü dangi meyipdaksütsü atema mesüzüker, ta tai tongloksü.

Tribal nisungtem Khristan yimsü dangi meyipba ajanga tribal nisungtem tsüngda rara adoker, ta police ketdangserisa metetdaksü.

Iba ya state nung Khristantem anema maneni inyakba tetuyuba ka lir, ta aija July 13 nü Chhattisgarh Christian Forum Tir, Arun Pannalal-i sangdong ka ajanga, "Shidakba agibo police-i tiyongtsü nung inyaktsüla aser senso ajak temeden kümzüka ayutsü atema inyaktsüla, ajisüaka yangibo (Chhattisgarh) police-i yimtenren party ka ama inyakba aser kuli kecha makai Khristantem anema inyakba,"

ta metetdaksü.

"Iba tetuyuba ya linük temzüng alema lir. Police ketdangser kati linük temzüng tashi amshiba ya tim masü. Police-i Khristan missionary temi yimsü dak sendakba sentongtem ayongzüka agir ta aitsür, ajisüaka linük temzüng nung tamangba yimsü dak sendakba sentongtem ayongzüka agitsü atema temeden agüja lir," ta Arun-isa metetdaksü.

"Superintendent of police (Sunil Sharma) ket nung report kwi bendena lir? Missionary temji shirnok," ta paisa asüngdang.

Chhattisgarh Christian Forum Tir Arun-isa, "Ozüng alema tamangba yimsü meyipdaksüba osang lira ketdangsertemi court nung kuli agütsütsüla, ajisüaka yamaji ken o benoka mali aser tribal nisungtemji tesüiba küm 20 dak tema Khristan yimsü bentshia arurtem lir," ta metetdaksü.

Police ketdangser Sharma-i police ketdangsertem dang Khristan missionary tem aser Khristan yimsü dangi meyipba tribal nisungtem dak tenük yokang aser pa nem osang metetdakjang, ta tuyuogo.

"Anasa aliba district tem nung yimsü melenba dak

sendakba nung rara adokogo, saka onoki yangibo yamaji matalokdaksüner. Ozü ketdangsertem dang parnok meyong network ajanga nisung mesüzüka yimsü meyipdaksüba osang bendentsü tuyuogo," ta pai metetdaksü.

Chhattisgarh Freedom of Religion (Amendment) Act, 2006 ajanga tamangba yimsü melenshinertemi anogo 30 jelia local district magistrate dang nungi temelega meshitsü tuyur aser magistrate-i mashishi nung ang yimsü melentsü akok.

Chhattisgarh Freedom of Religion (Amendment) Act kübok aibelenertem küm asem tashi tepuokdak ayutsü aser senchi 20,000 tashi achitsü akok.

2018 küm tashi Chhattisgarh nung BJP sorkar liasü saka Congress-i state nung BJP sorkar atsüngdok. Ajisüaka state nung BJP aser parnok den tesendaktep aliba teloktemi state nung Khristantem anema inyakba manener.

Chhattisgarh nung nütsüng million 23 shi lir, aser nütsüng shilem 98.3 bo Hindu nunger lir. State nung nütsüng shilem 1 Muslim nunger lir aser Khristantembo shilem 0.7 dang lir.

ANO GO ABEN TSÜNGREM DEN

Meranga inyakaka tajangzük manguba

"Kibuba, ammag piyong onoki zütsük ona liasü aser kecha mangu" Luk 5:5

Luk 5 nung Peter aser medemertem kanga meranga inyakba angopurtem. Parnok pei mapa nung temulung agüja zütsük shidokya aliba mapang nung Yisui Pater nunger ajuru. Parnok aonung piyong memejangi inyakba, ango aputsü merangdang sernung kecha tajangzük maliasüba indang shia angur. Yisui parnok den rong nung ia mener külen, parnok nem kong aser koma zütsük aon nung teimba aputsü iba indang ashiba sülen atangji Peter nungeri ango aika apu aser ibaji parnok rongnung masem nungji, tangar rong-a ka jasemerang ango bener shilangba angur.

Karibo kanga meranga inyakker sernung temoatsü mamongba ajangshir alitsü. Mapa nung jangratem manguba alitsü. aseni inyakba mapaji jenti süaka, shinga majangzüsüba mapa inyakker asütsü akok. Nai ne mapa atema Yisu dang shidanger asütsü akok. Nai ne mapa atema Yisu dang shiadanger meshidanger? Mark 6 nung nütsüngtem meranga inyakka senzür arur külen Yisu dang parnoki ajangshiba otsü ajak ashi ta angutsü. Yisui angateter, ne mapa indang Yisu den lemsatepdangang, ne den Yisu lira mapa ajak nung temoatsü aser jangratem alitsü.

SARASADEM

Kibuba, Na kü den lira ajak ajungtsü ta ni metet. kü nungdak nung na ni anasa lir anungji ni pelar. Amen

Mexico nung Arogo kati kibong 782 indang medical sentsüh agütsü



St. Bede Episcopal Arogo Tenla ki noksa nung angur.

July 16, 2021: Santa Fe (US) nung aliba Arogo kati New Mexico aser Arizona nung kibong 782 indang medical sentsüh dollar sen million 1.4 jungnüa agütsüogo.

St. Bede Episcopal Arogoi New Mexico aser Arizona nung aliba kibong 282 indang medical sentsüh dollar sen 1,380,119.87 aotsüogo.

Osangbener den jembidang Rev. Catherine Volland-i, "Taoba mapangtem nung iba Arogoi iba ama ya inyakker asü meinyakar ni mejangja. Arogo outreach mapa inyaktsü atema hopta shia tenla aruba nungi shilem 10 bendena ayuba agi onoki iba mapa ya inyakketogo. Arogo atema tangar tenzükbaji kanga tongtibang," ta metetdaksü.

Arogoi New York nung aliba organization- RIP Medical Debt den senteper iba mapa ya inyakka liasü, ta laisa metetdaksü.

RIP Medical Debt-i America nung kanga nüngdakba kibongtem yaria medical

sentsüh aotsütsü atema donor funds amshia sentsüh shilem tera alizüker. Tatishitsü agi, iba organization nem sempet dollar sen 500 agütsü nung medical sentsüh sen 50,000 shi atoker.

"Sensak jenjang nung alirtem jangjaba sülen onoki parnok sentsühji alizüker aser parnok khu pungbadaksür. Iba sülen onoki tajangzük angutsüpur kibongtem nem osang metetdaksür," ta organization indang website nung shia lir.

Survey of Income & Program Participation ajanga ashiba agi, 2017 küm US nung kibong shilem 19 bo medical sentsüh liasü aser 2020 küm nung US nung kibong million 128.45 nungi kibong million 24 medical sentsüh liasü.

US nung tanak nisungtem kibong shilem 27.9 medical sentsüh liasü, temesüng nisung kibong shilem 17.2 aser Asia nunger kibong shilem 9.7 medical sentsüh liasü. Hispanic kibong shilem 21.7 medical sentsüh liasü.


OLONG PAITEP # 5877

1			2			3			4	
			5		6		7			
8										
			9							
	10									
									11	12
			13				14			
15						16				

- | | | | |
|--|-------|----------------------------|-------|
| TIPIEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang tongtonglatsü atu | - (5) | 10. Tetsüng tajemtdak | - (6) |
| 15. Tejen lai nung tesayur | - (5) | 12. ___ adenshi | - (4) |
| 16. Tsüngsak-mopung | - (5) | 14. Tsünüsenbongsü adokdak | - (3) |

OLONG PAITEP # 5876 TELANGZÜBA

- | | |
|---|--|
| TIPIEN : | LANGTSÜNGLEN : |
| 1. Kasa, 6. Rangben, 7. Mait, | 1. Khu, 2. Süjak, 3. Onük, 4. Oba, |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, |
| 17. Rajang, 20. Lanu, 24. Nüngjem, | 10. Tar, 12. Tinu, 14. Salem, 15. Aja, |
| 25. Süra. | 18. Anünü, 19. Taju, 21. Ano, 22. Onü, |
| | 23. Kua. |



TANÜBO NAI LANGZÜANG

Q. Koba State nung India indang mezüng Cryptogamic Garden lapok?
 A. Maharashtra B. Madhya Pradesh
 C. Andhra Pradesh D. Uttarakhand

_____ (Taruba adok nung onoki langzüsü)

YASHI ADOK TELANGZÜBA : Both A and B

AO OSHI ANGAZÜKDAK:
TANÜ ANGAZÜKTSÜBA OJANG



Kijem
 (n) Kibong akümba ajanga longjemba (inter marriage relation)
 * Tsüngrem metetba kibong den kijemba agi pelatepa alir.

Kijung
 (n) Kibong nung apuani na prongla taküm aliba mapang (family with both living husband and wife)
 * Yimtak kijung kibong aika alibaji Tsüngremer temoatsü.

NAI-A YA METETTER MA?

June 2021' nung sayaba ken tasen kar:

TRACK	ARTIST / BAND
- Eventually	Chiild
- Wild Sea	Dresage
- Paradise	Junaco
- Talk About It	Jungle
- Morning Star	King Woman
- Liz	Remi Wolf
- Un Millón	The Marías
- Stained Blue	RUMINA
- Reincarnate	Witch Fever
- Rose + Crown	AMMO
- What Love Is	Mike Mineo
- Rollin Stone	Little Simz
- First Time	Lucy Dacus
- Calling U Back	The Marías

SUDOKU # 5917

	4	3						
				2	7	8		1
			9	6		2		
			8					
5	9			1				
8	4					9		
			8		5			
			3			4	8	
1	8	7	2	5				

TELANGZÜBA # 5916

	1	9	8	7	4	2	5	3	6
	7	3	5	6	9	8	1	4	2
	2	6	4	1	3	5	8	7	9
	8	4	1	5	2	7	6	9	3
5	9								
8	4								
1	8	7	2	5					

OJANG LUTEP # 5462

LLUOO	:	<input type="checkbox"/>				
OANSO	:	<input type="checkbox"/>				
PKBROA	:	<input type="checkbox"/>				
JAACK	:	<input type="checkbox"/>				
NAAAMG	:	<input type="checkbox"/>				
AANJIG	:	<input type="checkbox"/>				
HKITSA	:	<input type="checkbox"/>				
AAM	:	<input type="checkbox"/>				
AÜKTGIZSÜ	:	<input type="checkbox"/>				
ÜMNNGDAEK	:	<input type="checkbox"/>				

OJANG LUTEP TELANGZÜBA # 5461

TAGITSÜ KÜMA INYAKTETSÜSA BILEMBA SHIA
 JUNGA SHISADANGA INYAKRA AJI TAJANGZÜK

TAN HOPTA ATEMA - KOMA SÜLA ?

Q. Naga yimten teblemstsü ya tang amai tatembang küma melatettet, ano, küm ter süi nunga koma süla ?



Lucknow, July 16, 2021: Hokolbarnü Congress General Secretary, Priyanka Gandhi Vadra Lucknow Airport tonga arudang tangokba noksa nung angur. Sangküm Uttar Pradesh Assembly election agitsü lia party asalentong yanglutsü atema lai anogo asemnü Lucknow semdangar.

Congress-i Centre dang gari totzü nung saru ajemang ta akhanger

Chennai, July 16 (Agencies): Linük nung totzü jenjang kanga atuba agi nübur ajak kongshir, anungji Centre sorkari petroleum products ajak nung saru ajemtsüla, ta Hokolbarnü Congress Party-i takhangba agütsü.

Iba dak alia Congress-isa sorkar dang kidang yanglutetba osettem nung saru magitsüla aser sensakertemi agiba osettem nung GST saru magitsüla, ta takhangba agütsü.

Chennai nung osangbenertem senden ka nung jembidang Lok Sabha nung Congress MP, Shashi Tharoor-i, "Tesüiba küm tenet tashi Modi-i aniba sorkari junga yimsü mesütetba agi India nung rongsenkettsüng mejungi kümogo aser ibaji ajanga nüburtem lenla ajak nung kongshio. Tawa survey ka nung shilem agir shilem 97-ibo

parnok tesensakba kümogo ta langzüogo, aser ibaji ajanga Modi sorkari rongsenkettsüng junga ketdang mesütetba temaitsü sayur," ta metetdaksü. BJP yimsüsüba kübok petroleum products nung jenjang maneni atuba dak sendakba nung Tharoor-i, assembly elections agitsü mapang anasabo totzü jenjang matu, ta ashi.

"(Election osang sangdongba sülen) May 4, 2021 nungi tenzüka totzü jenjang 40 ben tuogo aser petrol litre ka nung sen 12 aser diesel litre ka nung sen 10 agi tali kümogo," ta Tharoor-i ashi.

Congress-i aniba UPA sorkar mapang nung alima nung totzü tazü barrel ka nung US dollar 125 tashi atu aser iba mapang nungji petrol litre nung sen 75 tashi dang liasü. BJP-i aniba NDA sorkar mapang

nungbo alima nung totzü tazü jenjang barrel ka nung US dollar 70-a majung saka tang state aika nung petrol litre ka nung sen 100 dak tema kümogo.

Tharoor-i, "Tesüiba küm ka tsünga petroleum products nungi saru ajanga Centre sorkari sen 4.2 lakh crore ajangzükogo. Iba ya UPA yimsüsüba mapang nung ajangzükba dang nungi asemben agi timba lir," ta metetdaksü.

Paisa, taruba hopta Parliament tenzüka sülen Congress-i senden nung totzü jenjang kanga atuba tebilemtsü onük benoktsü, iba denji külemi France dang nungi Rafale tayimtsü alitsü tezüngzüktep agiba nung ochimashi aliba onük benoktsü aser Centre sorkari coronavirus wara maziüktetba onük benoktsü, ta metetdaksü.

August 9 nü Rajya Sabha by election agitsü: EC

New Delhi, July 16 (Agencies): August 9, 2021 nü West Bengal nung Rajya Sabha menden tazüng ka aliba atema by election agitsü; iba menden ya taküm küm tetenzüklen Dinesh Trivedi-i azüngtetja liasü, ta Hokolbarnü Election Commission-i metetdaksü.

Taoba mapang Trinamool Congress MP, Trivedi-i taküm February 12 nü Rajya Sabha menden nungi anener BJP nung dena liasü.

West Bengal nung rara atema pai Parliament nung kecha mesüteter, ta shia pai iba menden tokja liasü. Shidakba agibo Trivedi kümsük 2026 küm April ita nung ang tembangtsü liasü.

Election Commission-i, by election agitsü atema July 22 nü osang tejangja metetdaksütsü aser August 9 nü election agiba sülen kasa anogo nungjisa vote azüngtsü, ta metetdaksü.

Election Commission-i, by

election agidang coronavirus wara dak sendakba tetuyuba ajak shidak benshitsü, ta metetdaksü.

Coronavirus wara aliba nung ajemdaker taküm May ita nungbo Election Commission-i Lok Sabha aser assembly menden kar atema by election thinena liasü. Wara tanaben prokba nung nung ajemdaker May ita nungsa Andhra Pradesh aser Telangana state na nunga legislative council election thinena liasü.



July 16, 2021 nü Hyderabad nung Telangana Pradesh Mahila Congress-i linük nung petrol aser diesel totzü jenjang kanga atuba anema Indira Park nungi Raj Bhavan tashi longkak aita aoba noksa nung angur.

India nung ano nisung 38,949 dak Covid putet aser 542 asü

New Delhi, July 16 (Agencies): India linük nung ano nisung 38,949 dak coronavirus putet aser iba tashidak agi shiranger 542 süogo, ta Hokolbarnü Union health ministry-i metetdaksü.

Tang tashi nung India nung nisung 3,10,26,829 dak coronavirus putetogo aser iba tashidak agi shiranger 4,12,531 süogo.

Tang India nung coronavirus agi teshirangdakpur 4,30,422 dang kümogo, aser ibaji coronavirus caseload nungi shilem 1.39 dang lir; linük nung iba tashidak agi shiranger shilem 97.28 bo anepogo, ta Health Ministry-i metetdaksü.

Brihostibarnü samples 19,55,910 tendanga liasü aser tang tashi nungbo samples ajak senteper 44,00,23,239

tendangogo, ta ICMR-i metetdaksü.

Tang anogo shia coronavirus positive putetba shilem 1.99 dang kümogo aser hopta shia positive putetba shilem 2.14 dang kümogo, ta health ministry-i metetdaksü.

Linük nung iba tashidak agi shiranger ajak senteper 3,01,83,876 anepogo aser iba tashidak agi shiranger asüba shilem 1.33 kümogo.

National Vaccination drive kübok tang tashi nung coronavirus vaccine dose crore 39.53 dak tema agütsüogo, ta Health Ministry-i metetdaksü.

India nung yaküm September 16 nü coronavirus case lakh 50 ajung, December 19 nü coronavirus case crore 1 ajung, taküm May 4 nü crore 2 ajung aser June 23 nü crore 3 ajung.

Afghan rara nung India nunger photo journalist Danish süogo



Tamalen Danish Siddiqui-i tangokba noksa ka yangi angur. 2017 küm Rohingya refugee tem rong tilaka nung Bay of Bengal ajanga Bangladesh-Myanmar arrtsü adena aruba sülen tantsür ka kanga ani-belemer tzüküm nung kongshiba noksa nung angur. Telung noksa nung Danish Siddiqui angur.

New Delhi, Chiteni/July 16 (Agencies): India nunger photo journalist aser award angur, Danish Siddiqui Afghanistan rara nung süogo; Kandahar nung pa security sepaitem den külemi atongsema inyaka liasü, ta Hokolbarnü Afghanistan ambassador to India, Farid Mamundzay-i twitter ajanga metetdaksü.

Mamundzay-i twitter ajanga, "Yasüng Kandahar nung kü tembar, Danish Seddiqi asüba osang angashia kü melung raksar. India nunger Journalist aser Pulitzer Prize angusangi Afghan security sepaitem den külemi atongsema inyaka liasü. Hopta ana tejaklen pa Kabul-i aotsü lia ni pa ajurua liasü. Par kibong aser Reuters den ni mangyim jashi lemsateper," ta metetdaksü.

Kandahar kübok Spin Boldak district nung raraba mapang nung arrshi küm 40 dak tema, Siddiqui asü, ta osang angazüker.

Pakistan den arrtsülen Afghan security sepaitem aser Taliban kiralongrartem na tsünga raraba noksa aser osang pai bendenba mapang nung pa asü. Tesüiba anogo ishika Reuters atema pai Afghan-Taliban tsünga raraba osang bendenba liasü.

Tang anogo ishika Kandahar nung kanga sashia radar, aser Siddiqui-i raraba tesem nungji osang bendenba liasü.

New Delhi nung osangbenertem den jembidang Ministry of External Affairs otongdar kati, "Kabul nung asen Ambassador-i Afghan ketdangsertem den tongtepratepdar aser onoki par (Danish) kibong nem osang metetdaksüdar," ta metetdaksü.

Reuters team-i Pulitzer prize for feature photography award ngua liasü; Rohingya refugee tem timtemba noksa aser osang bendenba atema parnoki iba award angu.

Mumbai nung alisang Siddiqui-i 2017 küm Rohingya nunger refugee tem timtemba noksa aser osang bendenba ajanga 2018 küm pai Pulitzer award ngua liasü.

Danish Siddiqui ya Delhi nung aliba Jamia Millia Islamia nung Economics agia graduate asü. 2007 küm pai AJK Mass Communication Research Centre, Jamia nung Mass Communication degree ngua liasü.

Pa mezüng television news correspondent inyakba sülen photo journalism dangi meyip aser tesüsa 2010 küm Reuters nung aden.

Europe tzümetsüng lendong nung nisung 120 shi süogo



Hagen, Germany nung Nahma ayong nungi tzümetsüng adoka jana bongteta adoka gari tem nembanga aliba noksa nung angur. Tzünglu kanga sashia aruba ajanga ayong tilatem nunga tzümetsüng kanga sashia ayimer.

Berlin, Chiteni/July 16

(Agencies): Europe anüolen tsütsü tzümetsüng kanga sashia adokba sülen nisung tajemba agi 120 süogo aser ano noklang aika tia memetet lir.

Tzünglu kanga sashia aruba ajanga tzümetsüng agi ayong mubanga yima iba region nung timtem agütsür.

Germany nung tang iba lendong nung asür nisung 100 dak tema lir, yangji Chancellor Angela Merkel-i alima tzümopung melenba anema tasü ita raratsü ayongzüük.

Belgium nung nisung 22 süogom ta osang ajanga ashir. Kasa mapang tzümetsüng agi Netherlands, Luxembourg aser Switzerland nunga kongshi.

Germany nung Rhineland-Palatinate aser North Rhine-Westphalia state nung tamajungtiba kongshi.

Nisung meimchiri bener arutsüba tzü-mopung temelenshi ajanga tang ama tzünglu kanga sashia arudaktsütsü, ta scientist temi aiben jembia arua liasü.

Germany anüolen Ahrweiler district nung nisung 1,300 kong aliar mejangjai lir, ta ktdangsurtemi ashi. Iba tesem nung mobile network tem raksaogo, anungji nisung aika den osang magitepteter, ta iba tesem nung sorkar indang odongtar kati ashi.

Schuld yimtsüngbo ajunga amai metsüngbang, kong nisung 700 shi alir. Cologne anasa Erfstadt-Blessem jila nung tzümetsüng agi ki aika laodaktsü. Tzümetsüng agi taolen mali mubanger aliba nüburtemi ktdangsur dang teyari meshia liasü, saka tesem aika nung teyari magütsütet, ta ktdangsurtemi ashi.

Sinzig jila kübok matamabensar aliba care home ka nung alir nisung 35 nungi nisung 12 süogo, kong tzümetsüng agi parnok mejanga aliba ki mubanga liasü.

Belgium arrtsülen Rurtalsperre tzünokdang mubanga liasü saka teraksabo meraksa, ta ktdangsurtemi ashi.

Germany nung timtem nung alirtem bushia kumzüksü mechi police, sepai aser emergency service nung inyaker nisung 15,000 yokogo, aser tzü agi mubanger taolen mali ki kilem nung alirtem helicopter amshia aniden aser süngdong laoa aser jana agi lenmang nokdanga aliba tank amshia mürekteta liasü.

Washington, DC nung US Tir Joe Biden den senden ka amenba mapang Merkel-i mangyim tejashi lemsatep aser nüburtem kumzüksü maparen nung sorkari akok tashi yaritsü, ta shia liasü.

Nisung asü-amaba osang tejanga magütsüteter aser nisung aika par meyong ajak samaogo, ta North Rhine-Westphalia indang interior minister-i ashi.

Cuba-i longkak aiter pua aliba chioktsüla: UN

Geneva, Chiteni/July 16

(Agencies): Cuba nung longkak aiter aser osangbener pua aliba ya chioktsüla, ta United Nations human rights tekolakba Michelle Bachelet-i ashi aser sepaitemi tashi tali amshiba aija liasü.

Nüngdakba osettem agi anünga akumba, nübur temeden alenbanga ayuba aser sorkari COVID-19 tashidak wara junga ktdang mesüetba anema pongu lir Hokulbarnü Bachelet-i sangdong ka nung sorkari telangzüba agütsüba aitsü.

Deobarnü nungi tenzüka longkak aitba mapang nisung ka süogo aser nisung 100 shi pua lir, ta osangtem ajanga ashir.

"Ibai shisabulutsü lir, kechiaser pua alirtem rongnung karbo shinga dena osang magitepteter aser parnok ya kong aliar memetet. Pei temeden amshiba mechi pua alir ajunga tangsa chioktsüla," ta Bachelet-i ashi.

Nisung asüba atema temeja, temürek bushisüngdang tenzüksüla aser aibelena alirtem nem tapet temerenshi

agütsütsüla, ta Bachelet-i ashi.

Laisa Cuba ktdangsur dang internet service akhi ama kumdaktsütsü ajungshia liasü, koba hopta tetenzüklen shibangja lir. Longkak aitba mapang social media aser messaging services tem mamshiteti liasü.

Rongrongshirong ya United States ajanga ajungmeso aser senotsü teyaria agütsü, ta Cuba lenirtemi ashir, aser US-i tenokdanga agütsüba ajanga timtem ajuruba temai adoktsütsü atema social media amshir, ta tai tongloksü. Sorkari mera meshidak agiba ajanga timtem ajuru, ta Tir Miguel Diaz-Canel-i Bodhbarnü shia liasü.

Timtem koktettsü aser tanaben aibelen masütsü atema sorkari asen tebilemtsü kanga junga shisadangtsü nüngdaker, ta pai ashi.

Longkak aiter mesüzüka, Ato Kilonser Manuel Marrero-i custom fee atoktsü, senzüsemponger atema chiyongtsü, mozü aser danga tongtipang osettem nung tenokdanga agüja aliba salatsü, ta ashi.

South Africa nung rongrongtsü

kari ajungmeso: Tir Ramaphosa

Johannesburg, Chiteni/July 16

(Agencies): Taoba hopta azüdokshi aser rakzükraktemba ajanga South Africa anokshitsüba ya sentong yanglur liasü, ta rongrongshirong agi tamajungtiba kongshir aliba tesem Tir Cyril Ramaphosa-i semdangba mapang ashi.

"Rongrongshirong aser rakzükraktemba ajanga ya ajungmesoba nungi lir ta tejanga sayur, kong nisungtemi sentong yanglua liasü aser osang-ola agitep," ta pai Hokulbarnü ashi.

Ramaphosa-i Ethikwini Municipality semdangba mapang iba o ya shia liasü, kong KawZulu-Natal province nung Durban yimti densema lir, koba hopta tepiyong dokan tem kakkpoka ayuaba agi tamajungtiba kongshia liasü. Iba mapang nisung 117 asü, aser parnok ya kar khasetba aser kar dokan kakkpoka nungtepa ayuaba mapang ajemsetba alitsü.

"Asenoki parnok arishitsü, parnok aika jangjatetogo, aser asenoki asen linük nung iba ama tazüokba mali pei sünütsü südaktsüba aser azüdokshia rongrong madokdaktsütsü," ta Ramaphosa-i osangbener dang ashi.

Iba ama mapa tamajung inyaktsü ajungmeso ta temolung melemi alir nisung ka puogo aser ano nisung 11 mita bushir, ta sorkari Brehostibarnü shia liasü. Ayuaba densema aibelen balala atema rongrong adokba mapang nisung 2,203 pua lir.

Sorkari tekeraba nung mera agi asüba iba makmakshimak ya nokdangteter lila, ta Ramaphosa-i ashi aser KwaZulu-Natal nung nisung tereprangtsü sentsü nung ajemdaker tebilemtsü tali akumba indang khuret lemsatep.

Ochimashi mapa inyakba ken o ka bushisüngdangba nung kuli agütsütsü memolungba yong Ramaphosa jakdang inyaka alisang Jacob Zuma tepuokdak ita 15 ayu tenzüksüba anogo sülen longkak ait tenzüük. Makamaiter aser sorkar tenteta aliba African National Congress (ANC) nung züngsemtemi Zuma busema nokdaker.

Longkak aiter temi shopping mall aser warehouse tem raksaja yangji aliba osettem ayua tenzüük, aser police temi kechi meshiteti repranga ata.

Makmakshimak azüokba nung police yaritsü atema South Africa ktdangsurü defence personnel 20,000 dak tema yoka lir.

Temesüng nisung ishikati yimsü asüba 1994 küm tembangba sülen sepaitem tang timba yoka lir, aser Brehostibarnep tashinung sepai 10,000 shi yimti-yimtong nung lir aser South African National Defence Force-ia par reserve forces nung aliba sepai 12,000 jaogo.

Osettsüset ayuaba aser ki-o-jen raksatsüba tesemtem timba sorkari azüoka lir, ta South African Foreign Minister Naledi Pandor-i ashi.

"Tesem kar nung maneni osettsüset ayuaba lir. Shishilempaba tesemi aittsü meranger aridoktsü atema temeket nung alirtemi lungjemer nokdaker," ta lai ashi.

"Tesem timba nung tangbo süngjema kumogo. Tang asenoki tensa azüoka raksar aliba tanaben yanglushiba maparen tenzüksü nungdaker," ta minister-i ashi.

Rongrongshirong tekeraba nung azüoktsü mechi Business Unity South Africa (BUSA) ajanga sorkar dang ghonda 24 curfew benoktsü ajungshia liasü.

(Maneni tapak 9 nung...)



Russian Foreign Ministry Press Service ajanga sayaba noksa ka nung Russian Foreign Minister Sergey Lavrov (tiyong achichi) aser Indian Minister of External Affairs Subrahmanyam Jaishankar na Tashkent, Uzbekistan nung Central and South Asia 2021 mungdang nung külem tenzüker den noksa tangoktsü lia sensaksemba angur.

Ajay-i 'Rudra' atema maparen tenzüksü

Mumbai, Chiteni/July 16, 2021 (Agencies): Ajay Devgn-i digital sabang nung ajemoka, 'Rudra: The Edge of Darkness' ta nungja agütsüba web series atema maparen tenzüksü sentong yangludat. Iba series ya Idris Elba indang 'Luther' nung ajemdaker yanglutsü.

Social media ajanga lemsatepa noksa ka nung Ajay-i bangsemo yimya balaka nung awaba sayuogo aser Rudra' atema pai maparen kara tenzüksü akok. Iba web series ya Rajesh Mapuskar-i direct asütsü.


Nungtugu hairstylist Aalim Hakim-i social media nung Ajay indang noksa lemsatepa liasü. Iba noksa nung Ajay tereprangtsü asadanga, pai iba series yakta tangok tenzüksü imlar.

British series - Luther nung officer ka 'Serious Crime Unit' atema mapa inyakba sayur aser iba series nung ajemdaker

Rudra yanglutsü a s a l e n t o n g yangludat. Tawa, Rudra: The Edge of Darkness indang cast rongnung Esha Deol aniokba o s a n g sangdongogo.

2019 kum sayaba "Cakewalk" nung Esha-i tesüsa shilem agiba nguogo. Taoba mapang, Main Aisa Hi Hoon, LOC Kargil aser Yuva film nung Esha-i Ajay den külemi shilem agiba ajaki nguogo.

Maneni, Ajay-i pa indang taruba film 'Bhuj: The Pride of India' sayatsü asoshi terenemba lir. Iba film ya August 13 nü OTT sabang ajanga sayatsü.



Ajay Devgn

Anna Kendrick-i 'Alice, Darling' nung shilem agitsü

Los Angeles, Chiteni/July 16, 2021 (Agencies):

Director maparen nung ajemoka Mary Nighy-i yanglutsü aliba thriller film cast rongnung Anna Kendrick anisemogo.

'Alice, Darling' atema Alanna Francis-i screenplay zülutsüogo. Iba film ya Katie Bird Nolan, Lindsay Tapscott, Christina Piovesan aser Noah Segal nungeri produce asütsü. Kasa mapang, iba project atema Anna aser Sam Tipper-Hale nati executive producer inyaksü.

Tang, Canada nung Lionsgate den longjemer iba movie atema production maparen tenzükogo. Iba motion picture ya Babe Nation Films, Elevation Pictures aser Castelletto Films longjemer yanglutsü.

Director Mary-i "'Alice, Darling' ama otsü ka atema cast rongnung sempet tajung aketba actor tem anioktsü maangka anguba asoshi pelar aser parnok adenba ajanga iba otsü tali tepor jungdaktsütsü. Anna Kendrick, Wunmi Mosaku aser Kaniehitto Horn nunger den külemi iba project nung inyaksü asoshi yongyaseter," ta ashi.

Lionsgate nung Acquisitions & Co-Productions indang President, Lauren Bixby-i ashiba agi, "Lionsgate den longjemer 'Alice, Darling' ajanga takok angutsü asoshi onoki inyaksü. Iba psychological thriller nung tetsür asemi tongti shilem agiba angutsü.

"Temeyoktep cast aser tetsür telok kati achaayangba maparen nungitsü asoshi onoki yongyar," ta Bixby-i ashi.



Anna Kendrick

South Africa nung rongrongtsü... (Tapak 8 nungi...)

"Ibai asen democracy otsü nung khenyongi meputepba rongdak mapang ka lir aser sorkari tekeratiba nung mera agitsü nungdaker," ta parnoki Brehostibarnü sangdong ka nung ashi.

"Aser yangji tesem kar nung yimtungtem mürektetsü asoshi curfew benoktsüla aser oziung amshirtemi tanaben aziüoktetsüla," ta ashi.

Iba ama rongrongshirong ya ajanga energy, chiyongtsü aser

COVID-19 tashidak wara anema raraba nung amshiba osettem belenshiba nung tetsükdaktsü ajurutsü, ta Tir Ramaphosa-i ashi.

South Africa nung coronavirus tashidak den sendaktepa asüba ya hopta ka tsüngta shilem 43 kumogo, kong intensive-care yipten aser oxygen peria mali, ta World Health Organization (WHO) ajanga Brehostibarnü ashi, kong COVID-19 Delta variant jatetba mapang lir.

Nütsüng yongsük timtiba aliba province ana nung nüburtemi ki-o-jen raksatsüba aser osettsüset ayuaba sülen South Africa nung coronavirus cases züina akumtsü atema renema alitsüla, ta World Health Organization indang Africa director-i shiogo.

Iba rongrongshirong ya ajanga South Africa nung COVID-19 mozü agütsüba maparen nunga tetsükdaktsü ajurua lir.



OFFICE OF THE
KANGTSÜNG SENSO MONGDANG

P.O. TULI - 798618
DIST. MOKOKCHUNG : NAGALAND

TAKOK NÜNGSANG

Wabong L. Nungsang Jamir, Kangtsüng yimtiba nungi Government of Nagaland, Agriculture Department nung Joint Director menden tongtetba asoshi Kangtsüng sensosanger-i pa dang pelar aser tenüngsang agütsür. Tarutsü nung pa mapa nübor asoshi moajangma.

Sd/-
Tongpang Longkumer
President
Kangtsüng Senso Mongdang

Sd/-
Temjen Pongen
General Secretary
Kangtsüng Senso Mongdang

Security Forces-i NSCN-K (YA) züngsem ka apu

Kohima, Chiteni/July 16 (TYO): Police den longjemer Security Forces-i, July 11 nü Arunachal Pradesh, Tirap District kübok Tissa tesem nung NSCN-K (YA) züngsem ka puogo.

Osang tejangja angazükba sülen Security Forces aser police na longjemer Tissa anasa tesem ka meita aoba mapang NSCN-K (YA) züngsem ka apu aser pa ket nung pistol ka den injang aser sen 2000 ana alang opium bener aliba ngutetogo.

Ken o maneni

bushisingdangtsü atema aija alisang den pa ket nungi ngutetba osettem Wakka Police Station, Tirap District nem bendanga agütsüogo.

Maneni Security Forces-isa, July 11 nü Police den longjemer Tirap district kübok Hukanjuri tesem nung NSCN (K-YA) OGW ka puogo.

Sepaitemi pa ket nungi mobile phone ka aser sen lakh 4.28 nguteta liasü. Aija alisang den pai bena aliba senotsü aser phone, Deomali Police Station nem bendanga agütsüogo.

Surekha Sikri alima nungi pilaogo



Acting maparen nung ajemoka, 1978 kum Surekha Sikri-i political drama film - Kissa Kursi Ka nung mezüng shilem agi aser industry nunga lai film balala nung shilem agiogo.

Tamas (1988), Mammo (1995) aser Badhaai Ho (2018) densema, Sikri-i Best Supporting Actress atema National Film Award asemben tashi takok angu.

Surekha Sikri ya Uttar Pradesh nung aso aser 1971 kum National School of Drama (NSD) nungi la graduate asü. 1989 kum Sikri-isa Sangeet Natak Akademi Award takok angu. Sikri tebu ya Air Force nung mapa inyaka liasü aser la tetsü ya tesayur ka liasü. Lai Hemant Rege den kibong aküm aser tena jabosa - Rahul Sikri lir.

TV soap Balika Vadhu nung Sikri-i Kalyani Devi shilem agiogo aser iba mapang la kanga nungtugu aküm. Iba show 2008 kum nungi tenzükur külen nungi 2016 kum show tatem tashi lai shilem agia liasü.

Iba sülen, 2018 kum sayaba 'Badhaai Ho' nung lai tongti shilem agi aser la sempet tajung ajiteta, Best Supporting Actress National Award agütsü. Zoya Akhtar-i direct asüba Netflix - anthology Ghost Stories nung lai tesüsa shilem agiba nguogo.

Sikri anaben tashi stroke asü aser ita aika shiranga liasü.

"Tesuiba ita 10 tejakdang, ni 'brain stroke' asü aser iba timtem nungi melungi taneptsü ngudar. Mahabaleshwar nung film tangokba mapang, bathroom nung alang aser tekolak atsük. Temang nung timtem aliba ajanga mapa meinyakteti arur. Iba timtem nungi yakta taneptsü angutsü ta doctor temi shiogo," ta 2018 kum Sikri stroke ser sülen lai lemsatep.

Mumbai, Chiteni/July 16, 2021 (Agencies): National Award takok angur actress, Surekha Sikri temulungjang agi mapa meinyaki akümba sülen, Mumbai nung la asü. Sikri arishi kum 75 liasü. Sikri mapang talangka atema shiranga liasü aser; 2018 aser 2020 kum la anaben tashi tekolak agi mapa meinyak (brain stroke) küma shirang. Sikri indang manager ajanga la asüba osang sangoktsü.

"National award asemben takok angur actress, Surekha Sikri, temulungjang agi mapa meinyaki akümba sülen, la tanep arishi kum 75 nung iba akümli nungi pilaogo. La tekolak nung tanaben timtem adokba mapang nungi shiranga aru," ta sangdong ajanga metetdaktsü.

Sikri asüba osang angashia, actor rongnung, Manoj Bajpayee, Pooja Bhatt, Divyenndu aser Divya Dutta nungeri mangyim jashi lemsatepogo. Delhi Chief Minister, Arvind Kejriwal-i asür Sikri nem aküm agüja liasü.

"Actress Surekha Sikri ji asüba osang angashia, temulung taroktiba nungi mangyim jashi lemsatep. Tsüngremi la tanela moajangma," Twitter ajanga CM Kejriwal-i lemsatep.

Actress tejen, Sikri-i kum aika theatre, film aser television wadang nung inyaka aruogo.

Olympics asoshi Mirabai Chanu Tokyo tongogo



Hokolbarnü, Indian weightlifter Mirabai Chanu Tokyo tonga aruba mapang tangokba noksa ka yangi angur.

New Delhi, Chiteni/July 16, 2021 (Agencies): Olympics atema, India tsür weightlifter, Saikhom Mirabai Chanu-i St. Louis, America nung renemshia amungba sülen, Hokolbarnü la Tokyo tonga aruogo.

America nung, national coach Vijay Sharma aser assistant coach Sandip Kumar na tawabangba kübok Mirabai anogo 50 shi training agiogo. Iba training atema Target Olympic Podium Scheme (TOPS) ajanga senotsü teyari agüja liasü, ta Olympics.com sangdong ajanga metetdaksü.

India tenüng nungi shilem agir weightlifter rongnung Chanu kija alitsü aser Hokolbarnü, national coach Vijay Sharma aser assistant coach Sandip Kumar, coach

Pramod Sharma aser physiotherapist Aalap Javadekar nunger den külemi Tokyo tongogo.

Taoba küm, 'strength & conditioning' coach, Dr. Aaron Horschig kübok ita ana shi training agir sülen, taküm America nung Chanu-i tanabenbuba training agia liasü. Mezüing, Dr. Aaron den training agiba mapang, Chanu terberem aser tapubang nung timtem aliba metetdaksü.

2016 Rio Olympics atema tetsür 48 kg category nung Mirabai Chanu qualify süa liasü aser Chanu-i tanaben Tokyo Olympics nung shilem agitsü terenemba lir. Taoba Rio Olympics asayaba mapang, clean & jerk section nung asembe tashi lai ajungketsü makokba

atema, tamakok angu.

Ajisüaka, 2017 küm Anaheim, CA, United States kübok ayongba World Weightlifting Championships asayamung - tetsür 48 kg category nung Chanu-i otsüsutsüa touzük seret 194 (85 kg snatch aser 109 kg clean & jerk) ajungketteta Gold medal takok angu.

Maneni, 2018 Commonwealth Games nung, Chanu-i gold medal aser küm ka sülen, 2019 Asian Weightlifting Championships asayamung - 49 kg Category tetoktepa nung, lai "Clean and Jerk" nung bronze medal takok nguogo. Taoba Olympics dang nungi aruya Olympics nung Mirabai-i jenjang balaka nung shilem agia takok angutsü imlaa atar.

IOC refugee team ketdangsür ka dak COVID-19 tashidak potet

Doha, Chiteni/July 16 (Agencies): International Olympic Committee's refugee team ketdangsür ka dak COVID-19 tashidak potetogo. Tanungba asayar aser ketdangsürtem ka dak danga tashidak meputetaka, iba ajanga parnok Tokyo Games atema senzusenpongtsü sentong yanglur aliba nung tetsükdaksü adokogo.

"IOC Refugee Olympic Team 'Welcome Experience' ka atema Doha nung adenshi. Asayar 29 rongnungi 26 aser ketdangsür 11-i iba sentong nung shilem agia liasü," ta IOC-i metetdaksü.

"Tokyo-i apusoa mao tsüingda COVID-19 PCR tests agiba mapang ketdangsür ka dak tashidak potet. Iba sülen tashidak tanaben tendangshiba nunga potetogo. Team nung tanga züingsem ka dak danga tashidak meputet," ta kasa sangdong ajanga metetdaksü.

Doha nung 'Welcome Experience' nung asayar asem shilem magitet aser par asem rongnung Ahmad Alikaj (judo)

as er Abdullah Sediqi (taekwondo) na Tokyo-i Bodhbarnü aotsü liasü.

"Tena coach Alireza Nassrazadany-i meiner aotsü. Parnok asemprongla training camp nungi indang indanga arutsü," ta IOC-i ashi.

Ketdangsür shiba Qatari Public Authorities-i lokti nung aniner temang anepaludar, pa dak tashidak keta aliba temaitsü mesayur aser kanga junga lir.

"Ketdangsür ya vaccine ka dang agir liasü aser Welcome Experience mapang aser Tokyo-i mao tsüingda COVID-19 inyakyim ajak sülen tashi angaa anidakogo," ta IOC-isa ashi.

"Ibayongji team Tokyo-i tangsa tangbo maotsü aser Doha nung maneni training agia atatsü aser anogoshia tashidak tendangtsü," ta kasa sangdong ajanga metetdaksü.

Olympics nung refugee team ya mezüingbuba 2016 Rio Games nung benoka liasü.

Refugee tem ajak tasü aitba aser aremzüka aliba temaitsü parnok nem iba maongka agütsü.

Ligue 1: Olympique de Marseille nung William Saliba denogo



New Delhi, Chiteni/July 16, 2021 (Agencies): 2021-22 season atema Ligue 1 indang Olympique de Marseille nung Arsenal defender William Saliba aniokba sülen, pai loan tasembuba nung iba club nungi asayatsü terenemba lir, ta Premier League sangdong ka ajanga metetdaksü.

Taoba season, loan nung ita trok tashi Ligue 1 nung Nice club atema William dena aruogo. Ita trok tashi Nice nung aliba mapang, arishi küm 20 tain William-i asaya 22 nung shilem agi aser iba campaign nung Aiglons puri jenjang tukububa tongteta tembang.

2019 küm St Etienne nungi pound million 27 (dollar million 37) yong William aniok aser pai ano senior team atema khen danga asaya mali, ta sangdong ajanga metetdaksü.

Iba tenangzüktep shilem ama, loan nung season ka atema pa tanaben St Etienne nung

aden. Ano külen, taoba season ita trok atema loan nung Nice nung denogo.

"William den külemi ano season ka loan nung anioka asayatsü onoki lemtetogo. William arishi küm 18 alidang pai onok den külemi asaya tenzük aser tang pa arishi küm 20 dang asünung, pai asaya tsütsü yimya tasen aiak angazüka renloka odar," ta Arsenal Technical director Edu-i ashi.

"William dak asayatsü sempet tajung lir aser taruba season Marseilles atema asayaba ajanga pa kanga ajangzüktsüsa maongka angutsü. Football asaya tsütsü renloksü atema Ligue 1 nung season ka shilem agiba ya pa atema kanga tongtibang asütsü. Iba season piyong onokie pa den osang agitepa alitsü aser France nung Marseille den William-i tajungtiba nung shilem agitsü asoshi onoki imlaa atar," Edu-i shisem.

Nagaland nung Jul 18 nungi Aug 1...

"Tangalen nungi arurtem aser tourist temi COVID-19 vaccine dose anaprong agir lira, point of entry nung metendangtsü mesüra quarantine masütsü" ta paisa ashi.

Ano, dose ka dang agir alirtem aser dose agir anogo 15 süir alirtem point of entry nung metendangtsü saka parnok anogo tenet (7) quarantine asütsü, ta Kikon-isa ashi.

Sorkar mapa inyaker ajaki vaccine agitsüla:

Nagaland nung vaccine agir kangabo maliba atema tebilemstü bena HPC-isa state sorkar ajak vaccine agitsü atema telemetba agiogo. Iba ya State Civil

Secretariat aser Directorate tem nungi tenzüktsü, Minister Kronu-isa metetdaksü.

Sorkar mapa inyaker kari danga vaccine agitsü memolungra, pa/lai külem inyakerkem kümzüka ayutsü atema anogo 15 shia COVID-19 test indang negative result agütsütsüla. Iba mapa ya Head of Department-i ketdangsüa inyaksü, ta paisa ashi.

Nagaland nung COVID-19 vaccine peria dang lir anungji sorkari mapa inyakerkem wara anema rara nung shilem agia vaccine agitsü ayongzükter, ta Advisor Kikon-isa ashi.

(Tapak 1 nungi...)

District o district tsüingda senzürtem:

HPC-isa DTF tem dang district o district tsüingda senzürtem aser taxi tem kanga akanga mittsü tetuyuba agütsüogo.

"Taxi driver aser passenger temi COVID vaccine indang dose kabosa agir asütsüla" ta Kikon-isa shisem.

Nagaland nung MLA 60 prong vaccine agir asü koda ta osangbeneri asüingdangdang "ruling members ajaki vaccine agiogo saka tanga MLA temi agiba osang ano mejangja lir" ta Advisor Medo Yhokha-i langzü

NPCC-i anogo 10 nü lungkak...

"Nagaland state sorkaria Naga national worker temi özüngi memelaba tax saruba nung yariteptsü policy yangluba sülen nungi jenjang atuba azüoktsü mapa meinyaker" ta NPCC-i ashi.

State sorkari pei nübortem okrongdaksütsü atema kiralongratsü nung yariteper, ta parnokisa metetdaksü.

"Naga national workers dak alia Nagaland nung society, union aser association noklang aikati anogo shia, ita shia aser küm shia sen sarur aser iba atema sorkai kecha mashir. Item sen saruba ya tang nüngdakbatem aser kisüdang amshiba osettem jenjang nung temloker agir" ta parnokisa ashi.

Nagaland nung mapa teinyakdak mali kümogo aser linük kübok tesem balala nung mapa inyaker Naga nunger lanur meyirjang aika arua lir. Mapa inyakdak maliba aser ano entrepreneurs nem senotsü teyari magütsütetba ajanga loktiliba timtemdaksür aser jashidaktsür, ta NPCC-isa metetdaksü.

Nagaland nung bank aser sen aputsürtemi Centre-i MSME collateral free loan indang policy mapa küma inyaksü memolungra. Ano, chichiba entrepreneurs nem ang teyari kecha magütsür, ta parnokisa ashi.

Nagaland nung society, trade union aser association balalai fee agiba aser sen saruba tip atemtsü atema Nagaland state sorkari High Powered Committee ka tenteta mapa inyakdaksütsüla, ta NPCC-isa ashi.

Ano, Labour Commissioner indang office-ia trade unions/associations nem temelaba agüja aliba meyipa repringshitsüla kechiyong Nagaland nung özüing alema tax agiba asr sen saruba maparen agi nübortem timtemer, ta NPCC-isa metetdaksü.

Nagaland Governor nem agütsüba memorandum nung NPCC President aser ketdangpur 12-i sign süa lir aser parnok den yarisema online & offline signature 9,377 dena lir.

(Tapak 1 nungi...)

BILEM DANGANG

"Tamachi nisungi shisakar inyakba ngua atala menütsür."